

В ЧЕТВЕРТОК 5-Я СЕДМИЦЫ ВЕЧЕРА,

По предначинательном стихословим, вместо, Ко Господу внегда скорбети ми, кафисму 18. Клеплет же светильничное поскорю, труда ради бденнаго.

На Господи воззвах, поставим стихов, 10.

И поем самогласен, дважды. Глас 8:

Самовластно совлекохся, * первым моим преступлением, * добродетелей благолепия, * облекохся же в сие абие ко мне снизхождением Твоим * Слове Божий. * Не презрел бо мя еси в лютых страстех впадша, * и разбойнически на пути попрана: * но всекрепкою Твоею силою снабдев мя, * заступления сподобил еси Многомилостиве.

Мученичен: Мученицы Господни, * всяко место освящаете, * и всяк недуг врачуете: * и ныне молитесь, * избавитесь сетей вражиих душам нашим, молимся.

Ины стихиры, глас 1.

Подобен: Всехвальнии мученицы:

Пригвожден Господи на Кресте, * Адамово рукописание Божественным кошием растерзал еси: * темже расторгни узы моя Слове, * яко да Тебе хваления жертву пожру верою, * радуясь, время благоприятное поста ныне обретый, * еже всех во спасение показал еси.

Пощения светлостию иногда * Моисей сияя, славу Божию виде: * сему поревновавши смиренная душе моя, * на Кресте распростершему длани тебе ради благостию, * дела угоди, воздержанием и молитвою, * яко да улужиши Божественное наслаждение.

Ина стихира, глас 6.

Подобен: Архангельски воспоим:

Животворящему покланяющися Твоему Кресту, * неизреченныя к нам безмерныя Твоя благости Христе, * и тем просветивше души, воспеваем Тя непрестанно, * просяще благодушно, * радостию скончати поприще пощения, * и достигнути страсти Твоя воспети Господи, имиже спасл еси ны.

И в Минен 4. Слава, и ныне, Крестобогородичен.

Вход. Свете тихий:

Прокимен, псалом 98, глас 7: Возносите Господа Бога нашего, и покланяйтесь подножию ногу Его, яко свято есть.

Стих: Господь воцарися, да гневаются людие.

Бытия чтение. [Глава 18, ст. 20 – 33.]

Рече Господь: вопль Содомский и Гоморрский умножися ко Мне, и греси их велицы зело. Сошед убо узрю, аще по воплю их грядущему ко Мне, совершаются: аще же ни, да разумею. И обратившися отгуду мужие, приидоша в Содом: Авраам же еще бяше стояй пред Господем. И приближився Авраам, рече: погубиши ли праведнаго с нечестивым, и будет праведник яко нечестивый? Аще будут пятьдесят праведницы во граде погубиши ли я? не пощадиши ли всего места пятидесяти ради праведных, аще будут в нем? Никакоже Ты сотвориши по глаголу сему, еже убити праведника с нечестивым: и будет праведник яко нечестивый: никакоже.

судяй всей земли, не сотвориши ли суда? Рече же Господь: аще будут в Содомех пятьдесят праведницы во граде, оставлю весь град, и все место их ради. И отвещав Авраам, рече: ныне начах глаголати ко Господу моему, аз же есмь земля и пепел: Аще же умалятся пятьдесят праведницы в четыредесять пять, погубиши ли четыредесяти пятих ради весь град? и рече: не погублю, аще обрящу тамо четыредесять пять. И приложи еще глаголати к Нему, и рече: аще же обрящутся тамо четыредесять? и рече: не погублю ради четыредесяти. И рече: что Господи, аще возглаголю: аще же обрящется тамо тридесять? и рече: не погублю тридесятих ради. И рече: понеже имам глаголати ко Господу: аще же обрящутся тамо двадесять? и рече: не погублю, аще обрящутся тамо двадесять. И рече: что Господи: аще возглаголю еще единою? аще же обрящутся тамо десять? и рече: не погублю десятих ради. Отыде же Господь, яко преста глаголя ко Аврааму: и Авраам возвратися на место свое.

Прокимен, псалом 99, глас 6: Воскликните Господеви вся земля.

Стих: Работайте Господеву в веселии.

Притчей чтение. [Глава 16, ст. 17 – 33. Глава 17, ст. 1 – 17.]

Приемляй наказание, во благих будет: храняй же обличения, умудрится. иже хранит своя пути, соблюдает свою душу: любяй же живот свой, щадит своя уста: Прежде сокрушения предваряет досаждение, прежде же падения, злопомышление. Лучше кроткодушен со смирением, нежели иже разделяет корысти с досадительми. Разумный в вещех, обретатель благих: надейся же на Господа, блажен. Премудрыя и разумныя злыми наричут: сладции же в словеси, множае услышани будут. Источник животен разум стяжавшим: наказание же безумных зло. Сердце премудраго уразумеет яже от своих ему уст, во устнах же носит разум. Сотове медовнии, словеса добрая: сладость же их исцеление души. Суть путие мнящися прави быти мужу, обаче последняя их зрят во дно адово. Муж в трудех труждается себе, и изнуждает погибель свою: строптивый во своих устах носит погибель. Муж безумен копает себе злая, и во устнах своих сокровиществует огонь. Муж строптивый разсылает злая, и светильник лъсти вжигает злым, и разлучает други. Муж законопреступен прельщает други, и отводит их в пути неблагы. утверждай очи свои, мыслит развращенная, грызый же устне свои, определяет вся злая: сей печь есть злобы. Венец хвалы старость: на путех же правды обретается. Лучше муж долготерпелив паче крепкаго, [и муж разум имеяй паче земледельца великаго:] удержавай же гнев, паче вземлющаго град. В недра входят вся неправедным: от Господа же вся праведная. Лучше укрух хлеба с сластию в мире, нежели дом исполнен многих благих, и неправедных жертв с бранию. Раб смыслен обладает владыки безумными: в братиях же разделит [имение] на части. Якоже искушается в печи сребро и злато: тако избранная сердца у Господа. Злый послушает языка законопреступных: праведный же не внимает устам лживым. Ругайся убогому, раздражает Сотворшаго его: радуяйся же о погибающем, не обвинится: милуяй же помилован будет. Венец старых чада чад: похвала же чадом отцы их. верному весь мир богатство, неверному же ниже пенязь. Не приличны суть безумному устне верны, ниже праведному устне лживы. Мзда благодатей наказание употребляющим: и аможе аще обратится, успеет. Иже таит обиды, ищет любве: а иже ненавидит скрывать, разлучает други и домашния.

Сокрушает прещение сердце мудраго: безумный же биемь не чувствует [ран]. Прекословия воздвижет всяк злый: Господь же ангела немилостна послет нань. Впадет попечение мужу смысленну: безумнии же размышляют злая. Не воздаст злая за благая, не подвигнутся злая из дому его. Власть дает словесем начало правды: предводительствует же скудости пря и брань. Иже судит праведнаго неправедным и неправеднаго же праведным нечист и мерзок у Господа. Вскую бяше именование безумному, стяжати бо премудрости безсердый не может. иже высок творит свой дом, ищет сокращения: остроптеваяй же учитися, впадет в злая. На всякое время друг да будет тебе, братия же в нуждах полезни да будут.

И прочее последование Преждеосвященных, в немже причащаемся и святых Христовых Таинств. На трапезе же ядим елей и вино пием, труда ради бденнаго. В Студитове же Уставе повелевает сухо ясти всю тую неделю, паче иных, яко дние плача суть, а не праздника: в сих бо убо пети должно есть и Аллилуиа. Во святых же горы Типице разсуждает, на святых мученик 40, на Предтечевы главы обречение, и в среду Крестопоклонную, и на Великий канон, и на Неседальное, ясти два варения с елеем, и испивати по две чаши вина. Сия же назнаменованом любви вашей от обоих, да произволяяй спастися, благоутоднейшее пред Богом избирает.

Подобает ведати, яко аще случится Благовещение Пресвятыя Богородицы в сей день, поется последование Великаго канона прежде, с понедельника во вторник, сиречь в понедельник вечера. Праздник же бывает непреложный.

В ПЯТОК 5-Я СЕДМИЦЫ

НА УТРЕНИ

Троичны гласа. Таже кафисмы, 13, 14, 15.

По 1-м стихословии, глаголем седальны Крестныя Осмогласника, два, и с Богородичным.

По 2-м же стихословии, глаголем настоящий седален, глас 1.

Подобен: Гроб Твой:

Простерл еси Христе * длани на Древе, * исцеляя язву Адамову, язвами Твоими. * Темже молю Тя: * язвы моя исцели, яже наложи души моей льстец, * и сподоби в молитве и посте, * Спасе, угодити Тебе. [Дважды.]

Крестобогородичен. Подобен:

Зрящи Тя Христе, * Всенепорочная Мати, мертва на Кресте простерта, вопиаше: * Сыне Мой, собезначальный Отцу и Духови, * кое неизреченное смотрение Твое сие, * имже спасл еси пречистых рук Твоих Щедре, создание.

По 3-м стихословии, седален, глас 6:

Подобен: Упование мира:

Кресте, миру хранителю, * демонов прогонителю, * тя стяжавших во всем предстательство неоторимое * сподоби пощения прейти прочее, * совестию чистою, * исправляя души наша пред Христом, древо благословенное. [Дважды.]

Крестобогородичен. Подобен:

Чистая Дево и Честная, ангелов славо, егда предстояла еси Кресту Сына и Бога Твоего, не терпящи зрети поругания врагов, взывала еси болящи матерски: како терпиши, о Человеколюбче, всех прещения? Слава долготерпению Твоему.

Трипеснец господина Иосифа. И стихословится песнь. Глас 1.

Песнь 5.

Ирмос: Просветивый сиянием пришествия Твоего ...,

Прострый небо яко кожу, простерл еси длани на Кресте Иисусе преблагий: темже молю Тя, простерта мя вражиими искушеними, ущедрити.

Уснул еси на Кресте Иисусе преблагий, бодрость спасения нам подавая лежащим Господи, в дольнейшей погибели: темже Тя верою славим.

Страсти Твоя видети день, сподоби рабы Твоя провещенны сердца светлостию, и живоносное Твое Спасе Воскресение, поющая державу Царствия Твоего.

Богородичен: Зрящи Тя воздвижена на Кресте Всечистая восклицаше уязвляема утробою, и глаголаше: за милосердие Господи Твоих щедрот, страдати претерпел еси, всем подавай безстрастие.

Иный, господина Феодора. Глас 6.

Ирмос: От нощи утреннююща, * Человеколюбче, * просвети молюся, * и настави и мене * на повеления Твоя, * и научи мя Спасе, * творити волю Твою.

На Кресте руке Твои Человеколюбче распростерл еси, и гвоздьми пригвоздиша, и ребра копием прободоша иудее, и терпиши вся Христе, да мы спасемся.

Древа снедию умре иногда Адам, паки же обрете Древом крестным жизнь, имже щедрот наслаждается пищи внутрь рая.

Троицен: Едину Естеством Тя Троице воспеваю, безначальную, несозданную, начальственную, царственную, пресовершенную Единицу, Бога, и Свет, и Жизнь, Зиждителя миру.

Богородичен: В преестественном Твоем рождестве Чистая, законы естества Тобою разрешаются яве: ибо безсеменно раждаеши превечнаго Бога, от Отца рожденнаго.

Слава Тебе Боже наш, слава Тебе.

Крест, копие, и гвоздия Твоя почитаем Владыко: теми бо от тли нас избавил еси, Твоею страстию Христе, обезсмертствовавшихся.

Ирмос: От нощи утреннююща, * Человеколюбче, * просвети молюся, * и настави и мене * на повеления Твоя, * и научи мя Спасе, * творити волю Твою.

Песнь 8.

Ирмос: Чуда преестественнаго ...,

Притушил еси лукаваго Спасе, жала, пригвожден гвоздьми на Древе, терновым венцем одаялся еси укоризны, искореняя преступления терние. Темже воспевающе Тебе зовем: да благословит тварь вся Господа, и превозносит во вся веки.

Простерл еси на Кресте Христе длани, человечество собирая к Твоему познанию, и копием Твоим ребром пробостися претерпел еси, источив нам источник спасения, воспевающим: да благословит тварь вся Господа, и превозносит во вся веки.

Струями благоутробия Твоего Христе Щедре, очисти мое сердце, греховным угрызением осквернившееся, и реки умиления источити сподоби мя Христе Иисусе, да зову Тебе: да благословит тварь вся Господа, и превозносит во вся веки.

Богородичен: Стамну Тя Божественную, манну имущую Божества, познахом Отроковице, ковчег и трапезу и свещник престол Божий и палату, и мост, преводящий к Божественной жизни, поющия: да благословит тварь вся Господа, и превозносит во вся веки.

Иный.

Ирмос: Отроков песнь * воспоим Христу, * поюще с ними: * да благословит вся тварь Господа, * и превозносит во вся веки.

Распинается Христос, и оживляемь аз пою со отроки: благословите дела Господня Господа и превозносите Его во веки.

Мир от тли распятием Твоим избавивыйся, поет со отроки: благословите дела Господня Господа и превозносите Его во веки.

Благословим Отца, и Сына, и Святаго Духа, Господа.

Троицен: Троице равнославимая, пресущная Единице, Отче, и Сыне, и Душе, спаси верою поющия Тя.

Богородичен: Рождеству Чистыя Богородицы поклоняюся, поя со отроки: благословите дела Господня Господа, и превозносите Его во веки.

Слава Тебе Боже наш, слава Тебе.

Пою Твой Крест, имже спасл мя еси Христе, поя со отроки: благословите дела Господня Господа, и превозносите Его во веки.

Хвалим, благословим, поклоняемся Господеви, поюще и превозносяще во вся веки.

Катавасия: Отроков песнь * воспоим Христу, * поюще с ними: * да благословит вся тварь Господа, * и превозносит во вся веки.

Песнь 9.

Ирмос: Образ чистаго ...,

Виде Илия Господа в тонце ветре, истончив первее плоть молитвами и постом: емуже поревновавши душе моя, отвержи сладости дебельства, яко да узриши желаемаго.

На древо вознес первее Моисей змия Спасе, воображаше Твое воздвижение, еже на Кресте Преплагий: имже ядовитыя злобы змиевы, избавил еси вся языки поклоняющияся Тебе.

Во гробе уныния лежа, отягчающий имея камень недоумения: присноживотнаго не разумя, Спасе слова Твоего, и страха Твоего не чувствуя, ущедря мя и спаси Твоею благодистию, Многомилостиве.

Богородичен: Всех превышшая Владычице, страстей мя злобы вышша покажи, славяща Тя всеистинную Богородицу, и поюща Рождество Твое Чистая, непостижением, Богорадованная, почитаемое.

Иный.

Ирмос: Безсеменнаго зачатия * Рождество несказанное, * Матере безмужныя нетленен Плод, * Божие бо Рождение обновляет естества. * Темже Тя вси роди, * яко Богоневестную Матерь * православно величаем.

Распинаешися, и спасаеши мя: умираеши, и оживляеши мя. О благоутробия, о человеколюбия Твоего! кто виде, кто слыша, Владыку за раба приемлюща смерть поносную? Но слава неизреченней благодисти Твоей Господи.

Солнце яко виде Тя распинаема, зайде: како бо сияло бы, укоризну видя Зиждителя своего? яко и тварь вся преклоняема, распинателем вопияше молчащи: яко Ты Бог еси всех, аще и плотию страстен.

Троицен: Единого единородителю, единороднаго Сына Отче: и едине единого свете, света сияние: и единый едине единого Бога, Святыи Душе, Господа Господь, воистинну сый: о Троице Единице Святая, спаси мя богословяща Тя.

Богородичен: Чудо рожества Твоего удивляет мя Всенепорочная, како зачинаеши безсеменно необыменнаго? рцы, како девствуеши, рождши яко Мати?

Еже паче естества верою приемь, Рожденному поклонися: елика хоцет бо, и может.

Слава Тебе Боже наш, слава Тебе.

Нас ради подъят Твой кийждо уд страсть: ударение, глава: ланиты, заушение: руже, пригвождение, и ребра копие: изряднее же Крест. Но слава неизреченному благоутробию Твоему Спасе наш.

Катавасия: Безсеменнаго зачатия * Рождество несказанное, * Матере безмужныя нетленен Плод, * Божие бо Рождение обновляет естества. * Темже Тя вси роди, * яко Богоневестную Матерь * православно величаем.

Светилен гласа.

На стиховне, самогласен, дважды. Глас 8:

С разбойники на Кресте пригвоздивыйся Христе Боже, * и язвою Твоею человеческое естество исцеливый, * не презри мене, в мысленныя путедержатели, * и в разбойники безплотныя впадшаго, * и добродетели от них совлеченнаго, * и люте уязвеннаго, * ни от единого же от преподобных исцелитися возмогшаго: * исполу бо мертв есмь, кратчайший имея жизни останок, * на Тя имей едину надежду, * мертвым живот подающаго: * но обяжи ми струпы, * Твою искапав мне благодать, едине Человеколюбче.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

С разбойники на Кресте пригвоздивыйся Христе Боже, * и язвою Твоею человеческое естество исцеливый, * не презри мене, в мысленныя путедержатели, * и в разбойники безплотныя впадшаго, * и добродетели от них совлеченнаго, * и люте уязвеннаго, * ни от единого же от преподобных исцелитися возмогшаго: * исполу бо мертв есмь, кратчайший имея жизни останок, * на Тя имей едину надежду, * мертвым живот подающаго: * но обяжи ми струпы, * Твою искапав мне благодать, едине Человеколюбче.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Что вы наречем святии? * херувимы ли? яко на вас почил ест Христос. * серафимы ли? яко непрестанно прослависте Его. * ангелы ли? тела бо отвратистесь. * силы ли? действуете бо чудесы? * Многая вапа имена, и большая дарования, * молитесь спаситися душам нашим.

Слава, и ныне, Крестобогородичен, глас тойже.

Подобен: О преславнаго чудесе!

О преславнаго чудесе! * о таинства новаго! * о ужаснаго начинания! * Дева глаголаше, на Кресте Тя яко виде, * посреде двою разбойнику обещена, * Егоже неболезненно ужасно пороуди, * плакаше глаголющи: * увы Мне Чадо любезнейшее, * како Тя лютый народ и неблагодарный ко Кресту пригвозди?

На 1-м часе, кафисмы несть. На 3-м часе, кафисма 19. На 6-м часе, 20.

НА 6-М ЖЕ ЧАСЕ

Тропарь пророчества, глас 8:

Препетый еси Христе Боже наш, * поколебаяй землю, за еже обратити и спасти живущия на ней: * и паки утверждаяй ю за Свою благодать * и неизреченное благоутробие, * молитвами Богородицы помилуй нас.

Прокимен, псалом 100, глас 4: Милость и суд воспою Тебе Господи.

Стих: Пою и разумею в пути непорочне.

Пророчества Исаина чтение. [Глава 45, ст. 11 – 17.]

Тако глаголет Господь Бог, Святой Израилев, Сотворивый грядущая: вопрошите Мене о сынех Моих, и о дочерех Моих, и о делех руку Моею заповедите Мне. Аз сотворих землю и человека на ней, Аз рукою Моею утвердих небо, Аз всем звездам заповедах. Аз возставих его с правдою царя, и вси путие его правы. сей созиждет град Мой, и пленение людей Моих возвратит, не по мзде, ни по даром, рече Господь Саваоф. Тако глаголет Господь Саваоф: утрудися Египет, и купли Ефиопския, и Саваимстии мужи висоции к тебе прейдут, и тебе будут раби, и в след тебе пойдут связани узами ручными, и прейдут к тебе, и поклонятся тебе, и в тебе помолятся, яко в тебе Бог есть, и рекут: несть бога разве Тебе. Ты бо еси Бог, и не ведехом, Бог Израилев Спас. Постыдятся и посрамятся вси противящияся ему, и пойдут в студе: обновляйтеся ко Мне острови. Израиль спасается от Господа спасением вечным: не постыдятся, ни посрамятся даже до века ктому.

Прокимен, псалом 101, глас 4: Господи услыши молитву мою, и вопль мой к Тебе да приидет.

Стих: Не отврати лица Твоего от мене.

На 9-м часе кафисмы несть.